

16 MAY 1996
Mahathir-Ramos
RAMOS, MAHATHIR BERBINCANG DI TOKYO

MANILA, 16 Mei (Bernama) -- Perdana Menteri Malaysia Datuk Seri Dr Mahathir Mohamad dan Presiden Filipina Fidel Ramos dijadual mengadakan perbincangan Jumaat semasa persidangan mengenai Asia di Tokyo.

Perbincangan itu yang turut disertai para pegawai kedua-dua negara akan menyentuh isu-isu serantau dan pelbagai hala, kata Menteri Luar Filipina Domingo Siazon dalam kenyataannya hari ini.

Siazon, yang akan mengiringi Ramos, berkata perbincangan dua hala itu bersempena persidangan antarabangsa mengenai masa hadapan Asia dengan Mahathir dan Ramos menyampaikan ucapan dasar.

Persidangan itu anjuran akhbar perniagaan harian terkemuka Jepun Nihon Keizai Shimbun.

Siazon berkata pertemuan Mahathir-Ramos di Tokyo selari dengan persetujuan mereka pada 1993 untuk mengadakan perbincangan tidak rasmi bagi meningkatkan kerjasama antara Malaysia dan Filipina.

"Perbincangan itu juga dijangka memberi tumpuan kepada komitmen Asean berhubung kerjasama keselamatan dan pembangunan termasuk urusan perdagangan Malaysia-Filipina," katanya.

Selain Ramos dan Mahathir, penceramah lain dari Asean ialah Timbalan Perdana Menteri Singapura Lee Hsien Loong dan Menteri Penyelidikan dan Teknologi Indonesia Habibie.

Siazon menyifatkan undangan Jepun kepada Ramos untuk menyampaikan ucap-tama pada persidangan itu sebagai "pengiktirafan peranan Filipina dalam menggalakkan kerjasama ekonomi Asia-Pasifik".

Ramos, yang akan diiringi usahawan-usahawan Filipina, akan berbicara mengenai masa hadapan Asia dalam bidang kestabilan dan keselamatan serantau, katanya.

Semasa di Tokyo, Ramos akan mengadakan pertemuan dengan ketua lima agensi Jepun yang bertanggungjawab menggalakkan perdagangan dan pelaburan lebih erat antara Filipina dan Jepun.

Agensi-agensi itu ialah Tabung Kerjasama Ekonomi Seberanglaut, Bank Eksport-Import Jepun, Agensi Kerjasama Antarabangsa Jepun, Pertubuhan Eksport dan Perdagangan Jepun dan Yayasan Jepun.

Ramos juga akan mengadakan rundingan dengan Perdana Menteri Jepun Ryutaro Hashimoto mengenai kemajuan ekonomi Filipina dan usaha-usaha liberalisasi kerajaannya serta persiapan berhubung Forum Kerjasama Ekonomi Asia-Pasifik (Apec) yang akan berlangsung di Manila pada November tahun ini.

-- BERNAMA

ALJ AHH